

連雲書屋存稿

琴齋先生觀察漢黃

清履

幸爲屬下吏已載餘矣每晉

謁間於諮諏政事外相與縱設詩古文詞並示以連雲
書屋詩稿命爲校勘之吟賞餘覺大篇決流短章斂芒
縛而不釀縮而不儻自非精法律富吟哦者安能臻此
粹詣蓋先生平昔愛誦大蘇詩集及典試蜀中綰符海
外又親歷大蘇之枌榆與其宦跡邇來勾稽偶暇每遊
定惠之院臨臯之亭赤壁西山寒溪諸勝輒流連咏嘆
俯仰遺址而慨慕其爲人讀自號懷坡山人一篇知先
生瓣香所祝固自有在獨是文忠公在黃州則以團練

副使屏於寬閒寂寞。及在瓊州。亦因屢見左遷。而以別
駕安置昌化。故其詩之見諸營東坡築雪堂。與夫負瓢
行歌於僮耳間者。往往鬱勃淋漓。激昂慷慨。而先生當
重熙累洽之時。得以自展其功名勲業。凡所抽秘騁
妍。自無不可以見性情之閒適。辭氣之安恬。殆其遭際
之隆。有與文忠迥異者。昔文忠公嘗謂出處老少。麤似
樂天。而其爲詩。則一空依傍。獨自成家。先生之寄懷於
坡老者。毋乃類是。而況集中平黎諸作。歷叙夫勦撫。煎
施公勤匪懈。艱摯之氣。溢於言表。令後之守瓊者。可以

因其詩考其事而得其所以安輯之由則又如元道州之舂陵行豈僅得以誦章論耶請還質之先生當亦不以予言爲阿諛也嘉慶乙亥孟冬月錢清履敬跋

自序

詩以道性情。無性情則詩可不作。作亦不必存。然則人之有詩。其必有不能已者乎。余少年未嘗學詩。通籍後奉職京華。與同年諸君子。公餘之暇。砥礪德業。時相贈答。始學爲韻語。然多未成片段。隨手置之而不存。嗣銜命典試蜀中。守瓊南。見其山川之奇秀。風土之僻異。觸類興懷。緣情賦事。頗有動於中。而不能自己者。於是直抒胃臆。吟詠成帙。茲遊楚四載。於南北二省。流覽大半。山則歷衡岳。參廬。水則觀湘潯。江漢。登臨之餘。亦開

有紀述以發心性之蘊閱歷之奇合前後十數年所吟
嘯將及千餘篇同人之愛我者殷殷勸付諸梓予心歎
然而不敢藏拙乃諄囑好友竹西錢君爲之刪其繁冗
而不經意者僅存若干首名之曰連雲書屋存稿連雲
者從故里海島名也詞之工拙不敢計聊以志平生嗜
癖之癖性云爾嘉慶二十年秋八月琴齋居士和生自
識

連雲書屋存稿卷一

蓋州 焦和生 琴

聞秋聲有感

時奉書住居

派詳校

文源閣圓明園之一畝

琴瑟圖書

砧杵聲高動碧空。客懷終夜伴鳴蟲。一天淅瀝清秋雨。
半枕蕭騷落葉風。夢裏家鄉何日到。篋中書信隔年通。
村醪無力澆愁去。報說霜前到塞鴻。

村舍

結廬背郭自堅牢。幾處疎籬鎖寂寥。野圃日斜花影亂。
秋林風定鳥聲嬌。一峯當戶新螺黛。萬柳圍隄舊舞腰。

昨夜沙頭知雨過溪流初漲水平橋

次浩持道中卽景韻

故人歸去重行行一路風光愜旅情
四野綠雲秋稼好半林黃葉晚涼生
鵬盤孤嶼翎方健馬惜障泥雨乍晴
可憶平湖烟靄裏清吟人對數鷗輕

將發一畝園次伊雲林韻

西園兩月愛盤旋消盡塵寰溽暑天
此去青山和夢老幾回皓魄向人圓
醉來豪興思揮筆雨後新寒欲試棉
學步羣公愧枵腹空教祖述著先鞭

時又有校三分書之命

校書事竣歸都城

坐對湖山夏復秋一朝分別轉勾留
琢成佳句盈囊富添得歸鞍滿眼愁
小飲每邀林上月閒行常狎水中鷗
風光何日重來覓處處筇枝記舊遊

道中回望一畝園

驅車重去踏紅塵回首幽居悵望頻
天外秋山如送客雲間流水忽迷津
疎林不改來時路黃葉全非往日春
莫對西風空佇立斜陽滿地正愁人

過村舍書所見

籬根詰屈逐岩斜茅屋寥寥三兩家過雨新禾時偃仰
經秋老木剩杈枒烟藏犢背兒橫笛桑隱雛鬟女績麻
應識豐年耕織樂野人無意學栽花

飛飛白鷺下寒塘秋草淒迷護短牆山徑雲深松蔭碧
柴門風冷菜花香老農築圃初勤力少婦村居絕艷粧
曾得田家好風味紅塵應笑道途忙

歸來

歸來羸馬脫征鞍對客開懷傍藥闌却憶前宵望湖月
正吟好句伴秋寒魚鰕味美臨波買菱藕香清帶露看

今日齏鹽慙舊味
室人猶自勸加餐

和閻玉維同年客夜感懷元韻

幾處砧聲夜未休
不堪孤客尙淹留
笛橫明月雁橫塞

葉滿空堦風滿樓
小阮文章工寫恨

玉維乃浩持之姪

子山詞

賦慣悲秋何時却理歸鞍去
消盡天涯萬斛愁

與荔園浩持飲全秋濤話雨山房卽席得秋字

主人高雅古名流
日掃幽軒待客遊
藤蔓陰疎能受月
竹林風細最宜秋
江南嘉饌登鱸膾
研北新詩伴酒籌
聯句羞予無健筆
羣公應笑醉鄉侯

秋夜懺園小集與石癭荔園浩持各賦一景分得
心遠堂後土山五古一首限山字

非山忽突兀積土成孱顏綠野當其南掩映苔蘚斑怪
石列左右巉巖難躋攀上有百年樹陰森籠翠鬟倦飛
高鳥集繞徑白雲環地偏心逾遠幽境超塵寰我來登
絕頂城市一覽間主客拚一醉良夜幾人閒刻燭索新
詠自愧得句慳山色晚益佳徘徊不忍還何必隨赤松
長此訂余顏

過一畝園書懷

夙志愛岩壑願向深山居六旬塵外遊樂意闕禽魚自
別烟霞境鬱鬱歸吾廬遂令清夜夢迢遞追樵漁茲晨
喜重往良友同巾車出城風景別夾路槐陰踈夕陽映
山色空翠描難如行行至湖上人靜柴門虛落葉沒履
跡宿莽生前除俯仰增感慨流連念厥初伊昔當夏五
薰風來紆徐欣登天祿閣盥手讐奇書朝朝事染翰同
列皆簪裾退食出左掖歸路緣清渠嘒嘒暮蟬聲最宜
新雨餘湖邊或散步待月看芙蕖境靜物無擾心遠情
自舒同儕約觴詠滿飲爽浮蛆狂歌與醉墨能使幽懷

攄擬將塵土髣常傍仙人間一朝酒徒散佳景留郊墟
憶舊但極目渺渺空愁予因念榮枯意蝶夢同遽遽古
人貴行樂名論真璫璣奈何俗事攪回首徒欷歔幾時
謀二頃來此學荷鋤日偕素心友酌酒剪野蔬茲事恐
未遂茲願終難祛惄然理歸轡欲去還躊躇蕭蕭古原
上秋風吹白驢

遊萬壽寺觀假山

暇日訪名利詰屈穿深山步隨踈磬遠心共飛雲閒峯
迴寺門厰清寂殊人寰廣庭逾幽邃佛屋青苔環浮圖

怖鴿靜老木秋風刪最後聳疊嶂瘦石堆孱顏烟嵐望
突兀洞壑呈嫵爛或如蛟龍姿浮攬凌銀灣或若虎豹
勢蹲踞當雄關咫尺迷遠近悵望愁登攀得非靈鷲峰
飛來雲海間攝衣循石磴振策摩烟鬟數折到絕頂空
濶開冥頑劃然作長嘯逸韻驚孤鷗小憩山上亭坐對
楓林殷老僧畧相識烹茶汲幽潺相與話靜果妙義頗
能嫻因知佛國樂殊勝歧途艱前時履清境嬾駕塵中
輟重來增倦戀日暮猶忘還梵聲如留客道心依叢蘭
焉能掇俗障禪室安伏跼脫然悟前因洒爾忘憂患拈

花一微笑喜我緣非慳

胡果泉過我小飲以詩見贈次韻奉答

天涯知己別經秋
此夕開尊幸少留
人世幾回花在眼
春光一去雪盈頭
庾家清興三更月
陶令新詩百尺樓
爲問忽忽車馬客
賞音難得是名流

九日同荔園浩持赴 圓明園歸至懺園登土山

分賦得七古一首限登字

霜林慘淡烟光凝
涼颼颼颼新寒增
重陽有酒不得飲
又驅羸馬循秋塍
遠山如畫翠撲面
幾人把臂欣同登

西郊往返日已夕翩翩雅興猶堪乘懽園花木最幽勝
常時屐齒來頻仍主人愛客約歸騎同遊况復偕良朋
輞川不嫌近城市有亭可憩欄可憑土山突兀峙堂後
培塿高處成岡陵山巔一望見暮色夕陽樓閣開層層
陶公逸致自古少參軍談笑非吾能持螯舉白且同醉
旣卜其晝還篝燈依稀香味吐新菊徘徊澹月篩枯藤
忍寒對影復搜句胸襟清寂如山僧漏殘人靜始言別
到家未免妻孥憎

立春後一日雪荔園浩持潤亭集寓齋小酌分賦

得七古一首限立字

滕王蛺蝶交飛急四散因風遍城邑明宵北斗柄欲回
昨日東郊春已立詩人踏雪興偏豪忍凍追尋荷蓬笠
茅檐此際溢光輝清絕天花映佳什諸君逸思入風雲
健筆縱橫神鬼泣嗟予疎陋等巴人欲和陽春安可及
拚將濁酒餞殘冬傾盃共學長鯨吸年來酒債長安滿
何用囊空起羞澁况逢時玉灑蕭辰風光最稱良朋集
莫愁此身在異鄉相逢且盡金壺汁小庭積素晚愈深
彷彿瓊瑤沒階級挑燈留客伴黃昏梅花索句寒香溼

懺園小集與浩持石壠荔園分賦得楸上古藤限

藤字

楸樹枝柯古蜿蜒附老藤纏綿無俗態依倚似良朋月
綰陰千疊雲添畫幾層盤桓消溽暑塵慮坐來澄

范雲岩見招同王荔園閻浩持何周溪徐春曉遊
尙園卽次雲岩韻

壺中別有小蓬萊暇日招邀共舉杯盛地初逢雙眼豁
詩翁相伴幾回來蒼苔白石迎人靜野竹新梧稱意栽
最喜天光能助興微雲如絮送輕雷

近軒花柳更婆娑對景開懷捲白波此日登臨追庾謝
座中賓客有陰何龍津喜見干將合燕市應聽慷慨歌
時周溪以服闋初返都門勝境良朋難作別歸來斜月轉庭柯

夜中微雨既過比曉猶陰

人靜蛩吟冷齋空秋氣深不眠聽小雨幾處送商音客
館侵孤枕高城雜夜砧溼雲戀寒碧傍曉尙微陰

重遊清梵寺疊去年壁間詩韻

蕭寺依然傍翠微行來猶記舊禪扉香臺語靜僧相識
古院花殘鳥共飛草映風檐翻綬帶松遮雨徑卧苔衣

最憐壁上題詩在幾度披吟未忍歸

驚秋

一葉梧桐一片秋忽忽節序水東流青春過眼真如夢
白髮無情欲上頭性僻只應田舍老才疏終缺稻粱謀
飛鴻似識淒涼意也對西風話旅愁

暮冬送浩持同年任南河司馬七律四首

春明攜手醉瓊筵粉署同曹豈偶然

浩持與予卯辰兩次同年又同任西

曹漢上題襟無隔日曲江聯轡幾經年忽聞水國徵良

吏轉使蘭交別遠天家學淵源知素裕豈容賈讓獨誇

賢尊甫恭定公任部曹時奉
命至南河督修高家堰

北風颯颯動寒林日暮城南集素心
客裏送君難作別
座中把酒各霑襟離情可奈聽班馬
愁緒何堪付爨琴
好友臨歧多眷戀疎燈斜月夜沉沉

銷寒方喜聚良朋歲晚倉皇却送行
日下交遊初冷落
江干霜雪正淒清看雲應動鄉關思
望月還憐故舊情
珍重離羣遊宦客天涯莫聽鷓鴣聲

聖朝雨露正滂沱惜別休教感慨多
千里壯遊酬志願
百年努力可蹉跎安瀾久見支那鎖
底績欣無瓠子歌

良法師資今宛在勉旃此去慎風波

次秋僊對月述懷韻

小雨初過淨暑氛半輪秋月湧晴雲初臨曲檻移花影
又浸疎簾漾綺紋澹泊久拚心似水利名何事熱如焚
西曹逐隊今多載面目依然舊采芹

歷歷垂簷星斗文一樓花氣勝爐薰悲憂排遣惟朋侶
歲月消磨仗典墳清淨偶參黃老法

近日同僚朱滄淵
喜談道家修養法

唱酬時較鶴鵝軍歡遊眼底皆堪戀秉燭擎杯未忍分

遊尙園次王荔園韻

清曠名園日下傳平南世胄舊稱賢

尚藩於國初封平南王清曠其園

也山林好是臨城市花石都會閱歲年結伴當秋方縱

目主人愛客更開筵坐來恰值蕭疎雨綠老紅深分外妍

赴香山

霜林葉落北風涼一帶巉巖石徑長樹杪寒雲縈佛塔
山坳飛瀑擁仙莊熊羆盡逞雷霆勢甲冑羣依日月

光

是日健銳營弁兵備操演

天子豫遊來細柳高秋草色正蒼茫

重陽後一日同秋僊集荔園寓齋次韻

白眼憐交少青雲笑路遲相逢須縱酒得暇且談詩晚
桂凌霜後賓鴻倦翼時昨宵空未醉辜負菊花期

此夜良朋集蕭齋論正高月明光似霰風勢利於刀斃

脫塵寰苦難忘案牘勞來朝還待漏逸興未全豪

次日復以

公事早詣香山

殘菊四首次韻

極目秋容正渺茫零星殘菊尙餘黃凌寒不改蕭疎骨
耐久偏宜淡泊腸憔悴幽蘭堪結伴凋傷弱柳不成行

可憐形影全消瘦昨夜東籬又早霜

曾向柴桑得賞音寒松荒徑共蕭森落英慘淡還盈把
佳色離披尙可簪韻冷三秋風瑟瑟香銷九日雨泔泔
幽芳到老終當惜莫遣蹉跎晚節心

寒蜂冷蝶漫相撩幾日西風作意驕老圃生涯寧論晚
小山隱逸欲重招餘芬好送闌珊酒瘦影慵隨翡翠翹
蒼問長生求上藥壺天春色未寥寥

幾回色相悟前因洗盡鉛華無故新開放不曾延俗客
凋殘猶欲伴吟身白衣去後詩千首青女來時月一輪

收拾餘香歸物化餐英囊枕任頻頻

秋杪同荔園秋僊自圓明園回城便道遊萬壽

正覺

一名五塔

極樂諸寺

騎馬深秋官務閒同來尋勝叩禪關門臨一帶桃源水
寺疊千層靈鷲山松竹猶然超俗界佛天那復似人間
萬年爲祝吾

皇壽肇錫嘉名永不刪

五塔層層聳日邊森然屹立勢朝天登臨迴出空王界

創建猶題前代年

明成化年

古木陰森同寶蓋番僧清挺

儼癯仙

寺內喇嘛
住守之

浮生久逐緇塵裏何日雲端結淨緣

探幽兩度訪僧家勝侶招攜又看花聞道此間稱極樂
坐來相賞興尤賒梵宮曲榭宜清話老圃秋容對試茶
數里紅塵歸路近歡遊已忘夕陽斜

答秋仙病中見寄韻

抱恙憐君瘦多愁困我深蕭條經幾載依倚到如今纔
悟貧非病從知佛卽心起疴慙七發願學狄公針

仲冬與荔園過石癯寓齋小酌有懷浩持各賦七

古一篇得河字

天將酒友償詩魔燕市對酌時高歌六年相知世態少
一日不見離腸多邇來踪跡各南北更教塵鞅羈吟哦
文章事業兩莫就長安歲月空蹉跎此日嚴冬出西郭
歸來聯轡遙相過石癭投轄愛留客典衣沽酒杯盤羅
家無四壁慣作樂雅興不爲貧消磨荔園襟懷信洒落
愛予迂拙聯絲蘿風晨雨夕總聚會有酒不覺清顏酡
座中忽憶少一人浩持闔子同登科春明數載共握手
終日詩句相觀摩高談雄辯動四座司空遺範真無訛
去年雲署薦出牧旋擢司馬治南河同人爭餞設供帳

驪歌三唱隨青羸自從一別勞夢想江南宦況知如何
今夏維揚來一介聞君氣體方調和我將雙魚付童子
一紙曾否通清波人生聚散若萍梗駒隙鴻雪一刹那
功名富貴總幻化往事應問春夢婆相逢得意且盡興
對酒莫負鸚鵡螺醉來同作相思曲淚滴還將凍筆呵
荔園過寓小飲出和魏春松寒夜咏瓶菊詩屬余
次韻因成二律

良朋過訪碧山陰笑把黃花對客吟秋老何妨詩思瘦
夜寒不覺酒杯深霜枝久愜芝蘭賞畫省新聞正始音

幸附雲樓相唱和寂寥差慰故園心

膽瓶霜菊幾枝斜賦罷秋容浣筆花晚節與君同品格
淡交如爾總清華月明感舊人千里竹葉消愁天一涯

謂浩持在京時事也

晝短歡遊難盡興嚴宵只合醉爲家

同張石壚魏漁汀王荔園遊崇效寺看花

卅六年華夢裏身朱顏半已老風塵看花嬾放傷春眼
載酒愁逢得意人偶憩禪關談淨果恰從覺路悟迷津
相期借榻經旬駐同了餘生物外因

漁父次秋仙韻二首

浮生浪跡在天涯爲避塵囂遠世譁獨把綸竿娛歲月
每從江海卧烟霞鷺鷥浴雨羣相狎蓑笠迎風一任斜
乘化悠然忘得失水雲無際泛輕艖

扁舟日日傍雲開嘯傲中流更幾回垂釣或乘風浪去
歸帆還載月明來菰洲沙嶼多清境蘆笛匏尊絕點埃
樵客忘機應作伴相逢一笑醉蒿萊

又疊韻二首

極目澄波豈有涯一竿垂餌靜無譁烟籠孤棹含秋水
風定輕帆挂晚霞數盞醇醪天地濶幾聲漁唱海山斜

蘆花白處藏身穩醉卧滄洲繫釣艖

濯足滄浪一櫂開綠蓑碧箬任遲回春潮遠浦浮槎去
落日寒江罷釣來明月清風常在抱輕烟細雨總無埃
問津何必桃源路范蠡湖邊未草萊

送同年張石癯罷歸西湖

一官羈京華輕身棄田畝與子訂知心晨夕時聚首賞
奇而析疑論文還酌酒相處日以歡相交日以厚屈指
七年餘真作忘形友君家瀕水東我居遼海右水陸路
幾千把臂良非偶詎謂轉瞬間南北忽分手世事若浮

雲白衣復蒼狗營營蝸角名總歸無何有君去西湖邊
結屋倚巖藪林泉助清吟烟波滌塵垢秋霜掇晚菊春
雨翦早韭逍遙靈竺間斯樂真不朽適性養天年遠勝
綰組綬回首嘆故人空逐風塵走此日與君別此後相
思久出郭遠送行怕折長亭柳驪駒歌未已獵獵林風
吼兩地萍梗身後會可期否

寄答荔園見示灤陽近狀

勝地堪消暑郎官得壯遊山河饒氣象草木總清幽逸
興傳詩句閒情寄射侯

荔園在灤日以吟
詩習射作消遣

歸來明月夜

爲我話深秋

秋咏五首次許薇垣韻

秋雁

年來物候遞侵尋
又逐歸鴻一涇襟
飲啄雖償謀食願
飛鳴總抱漸遠心
欲詢往事難留影
久別家山好寄音
最是清秋明月夜
數聲嘹唳間寒砧

秋蟬

孤桐葉落客心驚
况聽秋蟬斷續聲
偶對金飈憐調急
知餐玉露得神清
幽齋幾傍琴書韻
深巷還隨砧杵鳴

劉勝當年甘寂寞寒涼起處若爲情

秋蛩

壁間牀下正啾啾長夜何曾聽少休久客幾回添別淚
深閨爲爾寫新愁哀鳴豈有難平者督織還能稱意不
刀尺寒衣驚歲晚可堪蕭索動深秋

秋柳

疎枝憔悴晚烟濃曾占春光曉露叢搖落頻經攀折後
蕭條可耐別離中當年人去千家雨此日秋深一笛風
陶令門前知在否青青空悵故園豐

秋草

飄零寸草欲銷魂
往日萋萋難共論
春夢不堪留燕子
秋風誰復憶王孫
詩成寧有池塘句
時過空悲霜露繁
寂寞芸窗猶愛惜
憑看綠意伴朝昏

疊荔園見示韻

南郭爲隣並城中
又近居婚姻欣具邇
談笑樂何如
悶借三蕉撥愁因五字
攄愛君幽興遠到處
卽吾廬探奇勤問字
喜接子雲居學博
君長擅才高我不如
挑燈一夜話琢句
兩情攄相約卅年後
湖山共結廬

寒暑差堪蔽何妨陋室居芝蘭論夙契膠漆有誰如老
驥心常在孤鴻志未攄祇應風雨夕與爾醉茅廬

春日次荔園韻

駒隙易蹉跎相逢醉且歌韶光一彈指人事幾流波愧
我詩情少憐君雅興多殘春將小別旦暮幸來過

時將赴灤

陽校書

暮春廿八日赴灤校書晚宿東直門

傍晚辭官舍及暝宿城東胡爲此汲汲王事在予躬灤
陽藏秘笈羣儒久研窮只緣鈔胥誤魚魯多混同讐校

恐未詳丹鉛資人功嗟予幼未學疎陋慚博通兩登天

祿閣

丁未年曾校書

文源閣

追蹤向與雄自懼任不勝自歎力

難充循省增惶恐往復幾撫衷暫閒息茅店簾薄穿春
風殘燈半明滅一榻依蒙茸繞城柝聲急雞鳴夢寐中
征夫懷前路披衣喚僕僮膏車秣吾馬出郭行忽忽何
時賦歸來匝月應畢工

連雲書屋存稿卷二

蓋州 焦和生 琴齋

奉 命典試蜀中寄答都門送別諸君子

匆匆出郭門軒車就長道此行入蜀中

聖恩感浩浩親友羣送行贈言寫懷抱或謂山水佳壯
遊風日好或曰人文奇桃李成陰早努力勉前行冥心
恣探討嗟予聆斯語惄然心如擣回首憶生平學問比
行潦偶爾弋科名文字實草草九年走風塵荒落復顛
倒一旦與司衡那能精鑒藻但竭區區誠公慎以爲寶

庶幾靜生明
蝦瑜分白皐
何敢誇勝遊
登涉博參考
況無錦囊詩
可存牀頭橐
縱遊浣花溪
羞對杜陵老
今茲揮手別
槐花落未埽
去時炎暑深
歸來霜雪皓
離合彈指間
惟願各相保

補和保定館壁題雙松圖韻

拂雲雙榦鬱盤盤
無數龍鱗走筆端
我欲題詩酬好句
驚濤驟雨逼人寒

由清苑至望都卽景四首

南六月熱如焚
幾處田家盡望雲
正想傾盆三日雨

滋苗萬頃滌炎氛

西來恰見密雲團界破斜陽急駐輦頃刻淋漓衣履溼
好風特爲送微寒

荒城憩馬已深更雨後浮涼分外清最是賞心初霽月
無邊皎潔向人明

堯母陵前樹色深

望都卽古慶都堯母廟在焉
廟後有陵是日館於廟西廊

蒲庭月

色轉涼陰澄懷對此真忘寐風露三更不覺侵

正定登隆興寺藏經樓

一名大佛寺

層樓百尺拓疎櫺縱目遙看豁性靈不道偷閑來佛國

真如飛夢入天庭
滹沱東去三分濁
恒嶽西來萬點青
回望故鄉烟樹隔
暮雲無際雨冥冥

井陘道中用荔園灤陽閒眺詩韻

石棧崎嶇磴幾盤
林巒深處陣雲團
太行羅列圍重障
綿蔓滌洄結浚湍
險路關心翻得穩
曉風作意不勝寒
淮陰勝蹟今何在
爲弔英雄一據鞍

自鳳嶺入新紅峽

鳳山環抱欲倒影
築城山中如築井
羊腸一綫繞巉巖
萬疊千層登峻嶺
憑高勢欲接雲天
四面峯巒一挈領

聞說周家集聖瑞鳳鳥飛來鳴此境南行數里入新紅
峽口兩山更奇警宛如雙劍插碧霄峽裡林泉聚幽景
葱蘢綠樹繞一亭汪洋清澗流千頃山花開落少行人
彷彿桃源與箕頰我今赴蜀咏皇華至此頓覺塵懷屏
停驂欲訪張仙翁白雲渺渺動深省

鳳縣有唐張果棲隱古蹟

留壩道中卽目

山居秦俗古繪畫恐難工犬吠雲林外人歸板屋中飛
泉橫鳥道秋雨入蠶叢今夕棲留壩閒聽落葉風

馬鞍嶺

馬鞍留壩驛所轄凡二十四嶺皆如鞍形上下各數里北近紫柏南連馬道烏攏江

流其下地
其偏險

杖策陟馬鞍曉霽秋林爽連棧去盤雲捫蘿快孤往高

處險若梯坦處平如掌列巖廿四重一一供清賞紫栢

接峯巒

紫栢山名

青羊流泱泱

青羊河名亦名烏欏江

老松茁虬龍怪

石卧獅象曠覽烟霞姿飽聽山水響頓忘行役勞不覺

襟懷做俯察更仰觀天機同浩蕩四句走風塵安得此

幽壤赤松何可尋悠然勞夢想

褒城道中

數日褒谷中一旦覩平壤沃野彌望開心目爲開敞綠

樹接村烟碧流動清響夕陽傍雉堞禾稼亦疎朗清風
吹客面颯颯漸森爽嗟予行路難四旬負羈鞅盛暑辭
都門蕭然獨過徃倏忽節物更秋深動注想自非金石
堅能勿嘆勞攘聊借褒城酒使我胸襟廣

穿五丁峽

清風生曉涼行客捐白羽出門見秋山蒼翠含宿雨行
入峽中奇勢闢靦縷雙壁欲插天懸崖負萬弩洞危
穴蛟龍石怪蹲虬虎石苔帶斑斕石痕留鑿斧聞是五
丁閒蒼然踪跡古神力想當年餘勇真可賈謫哉嬴秦

君愚矣巴蜀主蠶叢負劍山天險固門戶一旦貪金牛
關道失疆土我來入西川峽雲正吞吐夾岸樹陰森不
辨辰與午峽底流清泉冷然快聽觀對此山水佳殊忘
風塵苦忽聞雞犬聲數家結衡宇山花落繽紛恍入桃
源浦峯回路欲迷駐馬問漁父

龍洞背

怪石突兀山蒼茫山路詰屈連天長下臨大壑深不測
江水噴薄流泱泱峯回路轉見巨洞窅窈黑神龍藏
上有石峯最奇絕龍頭舉向青天昂蜿蜒石棧橫脊背

行人到此爭徬徨濃陰漠漠欲作雨知是龍躍雲騰驤
秋風蕭颯振林莽掉尾擺鬣鱗甲張須臾盤迴度絕頂
如騎龍背凌八荒行行朝天在咫尺朝天關在南雲表庶幾
瞻家鄉

朝天關

侵晨就雲棧出門指朝天朝天在何許高踞羣山巔亂
石傍古木萬仞一徑穿大江逼其側四面峯盤旋飛瀑
西北來空際流濺濺數折陟絕頂氣象羅萬千俯視高
鳥翔平看秋陽懸天梯碧落近咫尺星躔聯倏忽白雲

起據鞍影翩躚身行雲霧裏佳境相連綿恍如遺世立
縹緲揖羣仙又如入天國袖惹香爐烟風泉雜蟬聲入
耳聽泠然得非釣天樂欲奏帝廷邊徃復幾徙倚駐馬
肯著鞭四句歷山水仙界此地偏度嶺考斷碣金鰲久
雕鐫闕南石碣鐫金鰲嶺大始知斯闕古臨去還留連
字並明代祭嶺神文

昭化阻雨

水色山光送早涼秋風秋雨接天長行人暫息勞生夢
半日消閒駐益昌

雨發錦官諸友送行臨別贈言

四旬駐成都一旦旋車馬秋雨滿錦衢淋漓如注瀉出
郭路泥濘逡巡愁從者地主誼殷勤遠送羣在野駐軒
憩郵亭叙別各拜下嗟予素拘墟固陋聞見寡兢兢以
持衡自問慚大雅藏事幸無訛敢云矜瀟灑今茲賦曰
歸臨歧臂重把良朋尙意氣贈言共心寫努力應及時
盛世重民社令德無虛宣榮名豈空假王道本眞儒干
秋欽董賈薰蕕在當前任人自取捨不見文翁治與蜀
常留也

雨後次龍洞背

嘉陵江上路危棧接雲浮雨過驚塗滑風寒動客愁垂
鞭紅葉晚極目碧山秋數里經龍背星驂一憩留

由五丁峽宿寬川舖

陝鹵寧
羌界

拔地懸崖翠摩天峭壁青

峽南口連
滴水崖

飛泉噴石溜古木

障雲屏峽闢通三輔山開憶五丁往來時序別久役嘆

飄萍

斧鑿痕猶在砢砢石色蒼霜烘楓葉紫秋老槿林黃客
路添衣重郵鞭促馬忙寬川今夜宿村酒慰詩腸

雞頭關邊王荔園灤陽閨眺韻

峻坂峻嶒聳七盤

亦名七盤嶺

戍烟雞幘結營團雲連馬道

籠危棧

北接馬道驛棧路

石激羊河湧怒湍

下臨青羊河

怕見霜風

催葉落愁聞塞雁送秋寒北行褒谷還斜谷何日歸驂
得卸鞍

早發留壩見霜

今朝十月朔昨夜北風涼古道留人跡楓林染曉霜山
深寒氣晚歲閏小春長回首褒城路烟嵐隔渺茫

留侯廟

在紫柏山下俗名廟臺子

漢代稱三傑子房迴不同報韓仲壯志亡楚奮英風蕭

相身曾繫淮陰事已空功成能勇退千古仰冥鴻

宿南星鎮

霜隕褒斜木葉零今宵使節駐南星四圍山勢環屏障
萬壑溪泉動驛亭鸚鵡言中鄉信隔畫眉聲裏旅魂醒
此地近隴西出明朝沽酒南岐路無復來時柳色青
次
鸚鵡及畫眉鳥
計程宿鳳縣南齊置南岐州西魏改
鳳州諺有鳳州三絕柳酒手之語

曉度煎茶嶺

煎茶嶺峻接雲頭萬點蒼山翠欲流天外風霜驚遠客
林間烟靄溼重裘來時濃綠蒙危棧此日殘紅映戍樓

屈指秦關還晉水
霏霏雨雪幾添愁

槐陰

誰植三公樹
濃陰覆屋清
密籠樓鳥影
暗護讀書聲
爰暑囚風淨
莓苔著雨生
幾多林壑意
對此足怡情

通州旅館次壁間韻

時司通
州倉曹

忽忽鴻爪又來通
十載京華歎夢中
薄宦行踪真似梗
勞生物序忽如風
澆愁已厭盃
浮白感逝頻
驚葉落紅
稍喜長安猶咫尺
晚烟寒樹共蒙籠

千里鄉書久未通
羈懷頓起別離中
霜天幾看燕山月

雪夜初聞潞水風
好友遠來樽酒暖
新詩賦就燭花紅
是夕鄉人何人寫恨留佳句
壁上茶烟沒欲籠
尙儀部來

移居通州率成四律
用同年仁和張石壘主事遷

居韻 甲寅

潞水橋南乍卜居
官閒地冷故人疎
寄身茅屋三間足

屈指瓜期二載餘
半畝荒園邀月近
幾株古柳趁春舒

會心昨夢烟光好
迎面浮圖倒影初

時有司儲之役故
由京調通所居北

面一塔與城樓烟光映
帶恰是去歲夢中景況

爲司會計別京華
老屋清涼數口家
度地偏宜閒蔣徑

編籬恰愛種陶花門當衢路塵還淨居近旗亭酒任賒

最是庖丁游刃處養生餘論至今誇

饒居西偏有空園一所其隙地可種

花卉正門前達
通衢各牛市街

何時廣廈布恩勻大庇寰區寒士身宦海難停萍泛迹
蓮廬暫寄浪遊人親朋偶至尋前夢車馬無勞步後塵
舉室團圞心自樂粗衣浚飯不嫌貧

河干皓月轉銀盤習習清風入座寒千里書沈鄉夢隔
一樽酒盡旅愁寬詩成好句神先爽花發高枝鳥亦歡
回首春明已陳迹此身隨寓總心安

將赴瓊州任紀

恩并別都門諸友二首

戊午十二月

粉署趨公十五春曾無建樹答

楓宸一麾遠出初爲守五馬愁聞說牧民嶺海鯨波方
震蕩天涯黔首望恩仁菲材深自慙蚤負幾度逢人遍
問津

朱崖自昔屬遐荒萬里爰州道路長山海已窮南極地
人民雜處古黎疆春明難忘三生夢故土歸來兩鬢霜
知己臨歧空睠戀相思此後幾迴腸

路過揚州喜晤魏春松同年太守話舊作

暮辭都門匆匆別儔伍東裝赴嶺南登車日勞苦首
始燕趙接壤過齊魯晚抵王家營晨渡清江浦棄車
而水行洒然絕塵土安穩太平船恍同清淨宇坐愛舟
子歌卧聽長年榜開窗落遠岫亭亭日卓午水清見魚
游歷歷鱗可數春光更怡人妍暖無風雨行行至揚州
烟花快先覩繁華甲東南况值月三五時近元此邦有良
朋登岸訪治譜故人聞余來喜作南道主相逢叙寒暄
嘉味隨甌縷痛飲期盡歡千杯力猶努高設義薄雲相
對肝腸吐昔在白雲司丹筆多所補今治維揚郡春風

布和煦政不愧歐陽信知德澤普醉聞城上鐘漏下已
三鼓欲去更留連還似春明聚此別吳粵遙南北分銅
虎思君不可見空憶瓊花園回船聽鷄鳴江岸驚漁父

瓜州別浩持司馬同年後舟中賦此以寄用東坡

別子由韻

正月望
後一日

大江泱泱山突兀客舟已從瓜步發良朋別難見更難
粵游吳天雨索寞登舟回望烟樹隔雲水蒼蒼日將沒
今宵豈無村酒薄誰共舉杯邀明月燕山回憶聚首樂
浮雲易散心惻惻東西南北揮手別十載鴻泥嘆倏忽

自甲辰爲同年後與王荔園張石癯
輩作文酒會今無一人在都下者
嗟我今衰甚往昔
怕聽驚濤風瑟瑟愛君吏隱江山中詩酒清狂奉官職

杭州

武林風景信佳哉滌盡塵襟一望開極目空明山掩映
無邊奇秀水滌洞堤橋亭榭皆仙境寺塔樓臺絕點埃
自是兩間靈氣聚行人過此幾徘徊

湧金門外是西湖淺蕩風光一色鋪四面峯巒臨水榭
千家樓閣映冰壺孤山梅影憐和靖六井葑堤憶大蘇
纔過淨慈尋勝蹟南屏怪石雨模糊
是日雪後小雨止
遊淨慈南屏二處

度梅嶺

岩巖庾嶺截南天江廣中分兩界懸割據初聞秦漢日
開通猶記李唐年野梅得氣花先發越鳥知春聲早傳
絕頂煎茶瞻廟像曲江風度接雲烟

上有張曲江祠

登五羊城觀音山

羊城絕頂倚雲隈暇日憑臨萬井開五嶺蠻烟連島嶼
遠天蜃氣接樓臺仙人蹤跡時時見海客帆檣日日來
何必題詩更懷古重重割據只堪哀

東坡先生祠

內附子山石主
瓊州儋州俱有

少年兄弟共掄魁曾自歐陽門下來千古品題推國士

先生見歐韓富諸公皆以國士相待

三朝文字嘆奇才江湖潦倒罹詩禍

嶺海漂流爲黨災萍跡却教尊絕域一存儋耳一存雷

先生貶儋時子由貶雷州

先生渡海住瓊儋屈指瓜期已歷三風雨無人容僦屋

桄榔有地許營菴從遊弟子天荒破

志稱公贈弟子瓊州進士姜唐佐詩

有滄海何曾斷地脉白袍端合破天荒之句

侍膝佳兒樂趣諳

幼子過

遂使

狂榛風俗變醯婆春夢亦能參

眉山靈秀毓天人曠代奇才遠謫身忠義平生在君國

文章萬古仰雄醇九州鴻雪留佳話五夜金蓮絕後塵

海島遺黎薰德澤祇今禮教尚彬彬

僭人讀書者冠海外

遺踪在在盡堪思載酒堂邊有舊祠海上負瓢逢老嫗

黎村戴笠笑羣兒飲泉食芋心常樂談道吟詩志不移

欲識先生瀟洒處浮雲孤月是襟期

載酒堂在儋城東有東坡祠書院在

焉先生赦歸過嶺詩云浮雲時事改孤月此心明

洞酌亭

在郡城東北東坡得雙井於此太守陸公求泉上之亭名與詩名之曰洞酌

洞酌何人誌井泉坡仙手蹟憶當年甘香一日品評定

烹瀹千秋遺愛傳明月清風憑挹注惠通天慶共澄鮮

惠通泉在郡城東五十里三山巷下東坡經此飲之謂
味類惠山泉因名惠通天慶觀乳泉在儋州城東南隅
東坡俱思公故仿潮州祀花乳傾甌薦几筵公赦歸詩有當日無
有記
人送臨賀至今有廟祀潮州之句人以爲儋州
人祀公之識今洞酌亭上有公祠及書院俱在

瓊山二忠詩

邱文莊公

瓊山人由進士翰林陞禮部尚書文淵閣大學士以理學名所著大學衍

義補等書行世

五指南溟地有神遙從島外毓奇人早通經術官中秘
晚陟銀臺秉國鈞絕學淵源明體用等身著述詣精醇
至今嶺表瞻山斗廟食千秋傍海濱

海忠介公

瓊山人官戶部主事時上疏直諫世宗下獄論死穆宗時釋出為右僉都

御史巡撫應天後卒於南京右都御史任

農曹一疏震寰區大節凜然忠義俱直道馮恩堪並立

丹心繼盛亦同趨

馮恩上疏請斬三奸下獄論死戕干戊雷州楊繼盛以劾嚴嵩被害

秋正氣歸瓊島一代名臣重海隅晚守南京還坐鎮清

風遺愛泣三吳

史稱公為南京都憲約束諸御史嚴峻城市豪猾屏息公退肅然杜門靜坐後

卒於官荷帷帳簾有寒士所不堪者喪出江上送哭者盈岸云

景賢祠

祀唐宋以來十賢及元明諸公原名十景祠在郡城西門外後傾圯移二蘇祠側

誰將祠廟妥孤臣瓊管千秋俎豆新唐宋諸賢標勁節

元明幾輩接芳塵忠良坎壈名逾重豪傑沈淪道益純
正大由來天地塞後人景仰是前人

伏波廟

在郡城西門外偏北按東坡伏波廟記漢有兩伏波前伏波邛離路侯也後伏波新

息馬侯也皆有功德云云

兩漢南征越嶺開伏波韜畧掃雲霾衣裳未許埋鱗介
側貳難容恣虎豺貢享從教通象郡聲靈自此遍珠崖
祇今血食酬功德海表千秋尙永懷

颶風四首

己未七月二十起至二十二日止

今秋乍識海南天猛雨狂風繞樹顛南北東西渾莫辨

昏晝夜鎮相連

颶者具四方之風來時必和暴犁頭

蛛爪先爲驗老屋殘椽漏欲穿驚怪瓊人爭疾首新聞

異事倩誰傳

風起時侵入頭腦土人多以布紮護太陽穴使不入

天翻海倒駭荒城戎馬奔騰震電聲千戶棚窗如水洗

凡頂棚戶牖有紙糊之處風來無不洗刷淨盡百年樹木帶根傾

大堂前巨樹一株連根拔

去後山大樹亦倒六七株瓦飛棟折人民懼蛟舞鯨吞氣勢橫可嘆

農田新插稻此番傷損幾多莖

瓊人晚稻六月盡始插齊

半空風勢卷城樓廟宇祠壇幾處休港口汛兵吹矮屋

海邊賈客碎行舟窮民陋巷驚心嘆孤旅荒村失路愁

莫道官衙居室廣移床魂夢亦漂流

三日風停慰所思招魂未得尙如癡心寒柳子驚船句

膽落坡公颶賦詞

柳子厚詩有颶母偏驚旅客船之句東坡有颶風賦

遣吏四鄉

看水潦分曹到處恤瘡痍粵中林木難憔悴恰似嚴霜

隕綠枝

各處園林竹木花果遭風後皆枯槁矣

勸農歌

島外沿溪足水田宜晴宜雨早春天家家粳稻初栽罷

一望千畦裊綠烟

海南插秧絕早自臘月至正月內卽栽插全完

越鳥聲連布穀譁無邊吹鼓滿塘蛙使君貪看沾塗苦

不愛山溪野草花

早稻初收五月齊晚田十月是佳期豐年萬戶倉箱滿
正是爲官得意時

四季皆春生意覃島民終歲飲和甘官租不欠爭端息
十雨五風住海南

憫農詞

雜糧隨地可常栽諸芋花生到處培瓊地沿海水田頗少而沙石斥鹵之地最多民資以養生者諸芋爲最而花生次之花生并可壓油精穀易錢粗自用田家
勤苦亦堪哀

穀貴傷民賤害農閭閻無處得從容
賣絲糶穀供官課
剝肉醫瘡怕歲凶

栽秧男女各辛勤收割全家徧隴紛
獨有儋民男好惰

力田惟見女如雲

儋民男皆讀書考不成就
漁樵雜技一切耕種俱付婦人

挑柴賣芋復擔油百十成羣盡女流

瓊南婦女打柴賣
芋種販花生油往

往蒲路
盈市

北地此風從未見耐勞婦女獨爰州

儋女歌

趕墟貿易每高歌儋女如男赤脚多
入水使牛寧有袴

布裙遮體賴東坡

一切服苦事皆爲之并用
水牛耕水田終身不衣袴
惟有布裙一條曰東

裙坡

男子生來卽讀書求名不遂學樵漁可憐嫁作樵漁婦

席地無人問起居

俗重功名男子入學其婦卽許人筵席坐高椅凳否則終身坐地

兒入贅宮父白丁姑居平地媳高廳此風雖勵男兒志

倒置尊卑太不經

兒入學則媳高坐其姑仍坐平地

僭崖婦女雜黎風氣猛心豪男子同往往當場羣佐鬪

教人無處辨雌雄

此風瓊南各處皆有不獨僭州多半有訟師主使聚女成羣每人與錢百

十文卽爲出頭或聚衆抱呈喊冤或遇婦女自縊及病死之案明知無傷遇官下鄉相驗時卽恃衆向官勒取傷單官若不與卽不許官回署甚且有毆差打轎夫之事若一與之則屍親持以爲據訟師主唆翻控百端必

使遭事之家遂其訛索而後已其聚衆喊冤多係已結之案萬無情理男子不敢出頭卽雇女人恃衆攔輿具控及追究其男子則均稱孤寡此風實爲可惡余在瓊審得其情急爲懲治數年畧息各州縣亦無從前倡獮之事矣

載酒堂

在儋州城東志稱隱士黎子雲故宅水竹幽茂東坡與軍使張中載酒同訪子雲因

釀錢作屋爲遊樂所名曰載酒堂今爲東坡書院

載酒堂前水竹紆坡翁舊賞子雲居當年遷客歡遊處

此日諸生誦讀餘屋繞清風吹几席牕含深綠蔭琴書

我來瞻謁欽山斗

內有東坡祠

爲訪遺踪一造廬

庚申六月到儋

守宮

守宮隨處有海外獨無倫狂叫恒如雀橫行不畏人聲

最響而大盡循棚壁闌夜走案窗頻逢水防先飲朝來莫入

屑水夜間尋案頭硯池及殘茶

烏鴉

何處烏鴉好瓊南性獨靈桐花餐秀色好食木棉播祭

乞餘馨清明前後民間墓祭反哺通人道棲身學鳳停

好棲桐微嫌情嗜鼠每逐松鼠去皮食之甚惡劣鳴嚇不

五色雀

俗名丹鳳久旱見則雨久雨見則晴以色者為長飛止羣從之東坡曾有詩余在

瓊亦見數次
詩以誌之

瓊南五色雀蘇子入詩篇鸞鳳稱名似陰晴得氣先吉
祥殊眾鳥羽翼耀花天此地多梧竹休栖枳棘邊

波羅蜜果樹高大枝疎葉長而尖其果由老幹出
帶二三寸許下垂不靠枝葉如牛肚形

成時去皮子
肉皆可食

果曰波羅蜜嘉名錫佛經樹生無寄託蒂出亦零丁望

去疑牛肚熟時皮微黃有刺其
大小形色全似牛肚嘗宜酌酒瓶去外皮食
其瓢味似

甜瓜形似柚芽而暗黃如熟栗肉然子瓢皆適口咀嚼
辨肉辨中有一子煮食如栗可充饑

有餘馨

椽果

椽果誠珍品，炎荒產特奇。杏梅同氣味，橄欖作形姿。味甘

酸似杏形，中粗而頭尖銳，如橄欖狀。黎子呼名似坡公

而大長二三寸，核絕大，肉多粘核上。

想像宜。東坡海外集載：黎錚爲人質，木劉貢父戲之爲

木霜實，累累坐念故友，累累霜實，好于古有遺思。

海南石榴

經年常開花，結實相續不已。

五月安榴盛，海南殊不然。花開四時好，實結一年連。丹

荔難爭久，紅蕉共鬥妍。還聞堪釀酒，香美列賓筵。聞崖州有

石榴酒，但未經親見耳。

應爲南離地朱英得氣偏風和生蒂足日暖結房全照
眼恒如火流酸屢墜涎看花還食果恍晤石門仙

洋桃

形有棱角味甘
酸爽口秋冬熟

洋桃生海外結實晚來香色相留圭角甘酸帶雪霜清
含梅子冷爽比荔枝涼應勝瑤池獻飽餐還不妨

蕉子

瓊南芭蕉多結子由葉心出似手指形至
成時如木梳皮黃肉白味香脆如黃瓜

種蕉聽雨看青葱獨有南荒迥不同幾見垂房還結子
豈綠人力只天工玲瓏長就瓊梳樣賓祭頻登木果中

鮮荔柳皮均列宴始知海外異華風

民間以此果送禮
者每書蕉子幾梳

祭品亦用之其蕉結子後
卽枯伐其幹旁出芽如故

四足蛇每出屋間或牆上亦好緣樹行身長五六寸尾亦如之四足高寸半耳目指爪玲瓏

無比行走從容顧瞻自若

畫蛇添足原多事誰識瓊南有此蟲耳目玲瓏真異樣
步趨徐疾儼持躬循牆來往輕松鼠綠木徘徊勝守宮
瓊多松鼠守宮行牆間樹上應笑天機誇脊脇憑虛起滅尙憐風